



# 顧文康公文集

桂雲堂



顧文康公文草目錄卷之首

詔

奉宣撰頒告 謚號詔

奉宣撰頒諭安南國詔

御表

奉宣撰冊 天御表

制諭

奉宣撰諭禮部議上 尊謚制



誥勅

南京刑部尚書周倫

南京刑部右侍郎周廣

湖廣道監察御史端廷赦父母

翰林院脩撰倫以訓

倫以訓父母

翰林院編脩張寰

南京吏部驗封清吏司主事盛應陽

中書舍人毛希原

南京吏部驗封清吏司主事顧夢圭父母

刑部山西清吏司員外郎張寰

監察御史吳淮

刑部主事魏應召

魏應召父母

治中張秉正

少師楊一清曾祖父母

少保兼太子太傅吏部尚書兼翰林院學

士桂萼

詹事府詹事兼翰林院學士霍翰

吏部稽勳清吏司署員外郎主事潘潢

南京刑部河南清吏司員外郎鄒武

應天府府丞柴奇

南京吏部右侍郎張邦奇

四川道監察御史王繼禮

大理寺署右寺副事右評事朱節

吏部右侍郎徐縉

廣西道監察御史施山

杭州府推官陳箎

戶部廣西清吏司主事王松

翰林院編脩金璐父母

禮部尚書兼文淵閣大學士翟鑾

工部營繕所所丞張輔

蘇州府崑山縣知縣王朝用

戶部浙江清吏司主事徐元祉

直隸永平府灤州知州張國維

掌鴻臚寺事太常寺卿魏境

直隸大明府東明縣知縣沈大楠

南京都察院右都御史萬鏜

南京都察院右副都御史蔣瑤

蔣瑤祖父母

蔣瑤父母

顧文康公文草卷之八

明光祿大夫柱國少保兼太子太傅禮部尚書武英殿大學士臣顧鼎臣撰

詔

奉宣撰頒告

諭號詔

奉

天承運

皇帝詔曰昔者

天訖元運眷求有德俾作民主我

皇祖考太祖皇帝受命而興剪除群兇驅逐裔

肇振起綱常再造華夏

皇祖妣孝慈皇后匹德佐理協貞弘化戢和家

皇邦弼成帝皇萬世之業

太宗皇帝重華繼照奉天靖難安內攘外永奠

宗社不拔之基聖以繼聖神功俊德巍乎大哉

列祖繼作續承謨烈日臻鴻皞追我

皇考獻皇帝純心篤學精義體道馨香上聞慶

澤施于冲人嗣統承祧託身侯王兆庶之上

兢業圖治不敢暇逸于今十有七年矣深念

祖宗創守艱難于祀事典章容有未遑乃延讜

議考古經肇建四郊增脩九廟禮樂各

物亦略備具是歲季秋特舉明堂大享因用

文武廷臣議請恭上

皇考尊諡曰

睿宗知天守道洪德淵仁寬穆純聖恭儉敬文

獻皇帝升祔

太廟配侑

上帝聿循經理罔或踰越追慕

太宗皇帝功兼創守德成文武名號未稱恭上  
尊諡曰

成祖啓天弘道高明肇運聖武神功純仁至孝  
文皇帝茲復將舉大報禮于園丘重惟

天之申佑我國家鴻休大慶邃古無聞感朕久  
衷更稱

昊天上帝曰

皇天上帝因加

太祖皇帝尊諡曰開天行道肇紀立極大聖至

神仁文義武俊德成功

高皇帝

孝慈皇后尊諡曰孝慈貞化徽順哲仁成天育  
聖至德

高皇后昭儀備物祇奉 郊 廟大禮悉已告

成載諸簡冊藏之金匱俾子子孫孫世世禋  
祀勿忘勿愆是用詔告天下庶幾秉彝好德  
之民仰覩大猷莫不歡欣鼓舞囿享太平沐  
浴神化爰體好生之德弘施大賚之仁嘉與

中外臣民維新更始厥有寬恤事宜條列于後于乎聖本同天殷

上帝之薦配以

祖考祭則受福歛皇極之錫敷于臣民德積百年而禮樂斯興道協三才而神人胥悅沛澤鈞被有血氣者莫不尊親綸音昭宣具耳目者咸宜知悉欽哉

奉宣撰頒諭安南國詔

奉

天承運大明

天子詔曰天覆育萬物帝以好生爲德然栽培傾覆福善禍淫未嘗僭差

天子君臨四海華夏蠻貊綏懷罔間亦惟奉若天道命德討罪不敢自私朕膺

天眷命嗣承

祖宗大統于茲有年檢圖數貢厥有曠廢臣職者左右文武元僚謂當興師問罪顧朕德寡昧文教未敷天戈所指未免玉石俱焚過傷



神理故寧屈法伸恩俟其感化茲朕于是歲  
備舉明堂大享圜丘大報禮乃以季秋仲冬  
之吉辰恭上

祖宗尊諡廟號重惟

上天稱昊于理未當恭薦泰號曰

皇天上帝禮成之日詔告萬方咸令知悉  
念爾大小裔邦皆生息于

皇天覆幬之中

上帝宰制之下矧我

太祖高皇帝開

天御極之初爾安南國首先臣服

列聖繼世悉嘉爾忠雖數十年來虧于職貢道  
路遼遠傳聞之事未必盡然且爾國人多知  
書達理似難終棄茲用禮官議特遣重臣齋  
捧詔書開諭爾國王臣庶許悔棄舊過亟圖  
自新推

上帝好生之德俾薄海內外咸荷恩庥體

先朝柔遠之仁庶識時俊傑自知省悟欽崇

卷之五  
天道允協皇猷爾等其敬念之哉

御表

奉宣撰冊 天御表

伏以大道生

天無極建三才之本至真成

帝惟神握萬化之機闔闢雖二氣之推遷運行

實一元之統貫故

天開于子則鴻蒙判宇宙立

帝出乎震則四時行百物生是固非智慮所能

測識言辭所可贊揚者也恭惟

昊天上帝玉陛下積陽成體太虛耀靈得一以

清函三爲大群動之祖萬象之先凡日月照

臨星辰經緯山川流峙于四極人物充盈于

兩間生生化化之有常巨巨細細之咸遂皆

天之所含育

帝之所宰制也巍乎大哉獲以尚已莫與京矣

臣御名素慙冲昧夙荷恩庥膺曆數之在躬

承宗祧以紹統致烟燎奉明禋蓋亦有年叩

聞闔觀清光已非一日每獲聆于祝史輒有  
 感于尊稱言念至敬雖曰無文強名貴于得  
 實研精義于衷赤思若啓之折群疑于汗青  
 言莫違也臣謹按古傳記曰昊者廣也大也  
 夏天曰昊又曰皇者大也君也君而尊之曰  
 皇然則二字之意義自有偏全千古之傳訛  
 尤當釐正乃卜以戊戌冬孟之吉躬率臣庶  
 有事郊丘敬陳寶冊更上尊號曰

皇天上帝伏願下臨有赫旁燭無疆垂宸聽于

九重鑒愚忠于一得佑其心志俾道德日進  
 于高明相厥事功使治効誕臻于鴻皞雨暘  
 時若而百穀熟寒燠順序而兆民康綏介福  
 于慈親集休祥于胤嗣日昌日熾萬年引有  
 道之長以恬以熙八表臻太平之盛臣無任  
 瞻于尊號之大典

天仰之懇  
 帝欣戴悚懼之至

制諭宣默前

奉宣撰諭禮部議上 尊諡制

皇帝制諭禮部朕惟身備天下之大善歿膺天下之顯名媿宗稱于無窮垂母儀于不朽此天子尊親之大典慎終之要務也洪惟

聖母大行章聖慈仁康靜貞壽皇太后王國克生天作之合相我

皇考睿宗獻皇帝坤章敬順陰教肅雍仁厚興周風化行于江漢警戒成聖聞望達于家邦誕育眇躬夙承慈訓蒙而養之以正長而教

以義方益無所不至焉暨于入承大統治臻小康增光烈于

祖宗衍休祥于胤祚咸我

聖母啓迪之功善慶之澤也方期慈壽萬年備膺百福夫何遽此瘡疾遽爾弃違銜罔極之恩思報酬而莫及抱終天之恨徒攀戀而無從嗚呼哀哉追惟厚德弘深率土仰戴上薦徽號舊有彝章是宜采衆之公稱

天而諡以播告寰宇昭示后世庶朕荼毒之痛

人摧裂之傷其少紓焉爾禮部即會文武百官  
議擬來聞欽哉故諭

*（Faint bleed-through text from the reverse side of the page, including characters like '朕惟古司' and '刑部其職也'）*

誥勅

南京刑部尚書周倫

制曰朕惟古司寇掌邦禁明五刑以弼五教今  
刑部其職也逃矣留都厥責尤重匪貞賢弗  
輕畀焉咨爾南京刑部尚書周倫克生畿輔  
起家明經憲察理卿在著聲績暨登總臺歷  
卿貳才猷益著用采輿論擢今官維公維明

祇慎職守朕甚嘉焉茲以

郊恩進爾階資政大夫錫之誥命於乎伯夷降  
典折民惟刑司寇蘇公敬爾繇獄爾其益崇  
素節升於大猷匹休於古賢不亦永有耀哉

南京刑部右侍郎周廣

制曰士屹節效忠根於性匪徼於外斯國家植  
立而尊顯之厥惟艱哉爾南京刑部右侍郎  
周廣登庸先朝爲臺臣奮擊凶豎弗克顛頓  
屢幾於殆旣而歷試臬職雅志弗墮用陟總

憲撫方岳暨居今官聲績日起可尚哉茲用  
郊恩進爾階通議大夫錫之誥命於乎苟適  
於用曷施弗宜爾尚弼爾長明慎庶獄期於  
刑之中斯申錫有茂典寧爾靳哉

湖廣道監察御史端廷赦父母

勅曰朕惟世濟厥美者古所謂才也矧爲之父  
若子咸有勛德耀於後先者哉國家隆孝治  
而重錫類恩必逮焉爾端文用乃湖廣道監  
察御史廷赦之父明經抱藝舉於其鄉率先

多士才矣而命則不淑可惻哉重念爾父揚  
休先朝焯績大藩爾子復升憲臣翹英中  
臺顯庸之休不自爾躬亦何憾焉茲以禮典  
告成推恩京朝特錫之勅贈爾為文林郎湖  
廣道監察御史於乎作善之慶既有徵於後  
先命德之章宜無間於存沒式承褒寵良慰  
孝思

翰林院脩撰倫以訓

勅曰國家設科目以羅俊又其裒然傑出之士

必列禁近以為公輔之儲預茲選者厥維難  
哉爾翰林院脩撰倫以訓性資醇雅體貌凝  
重明經借計登名天府咸第上第迨列職史  
館用宣勞效特擢今官頃較文禮闈眾稱得  
雋被選講幄聿著才猷朕甚嘉焉茲有司最  
績來上特進爾階儒林郎錫之勅命爾尚邁  
志進脩稽古景行期策勛永譽光於前人斯  
顯鬯之休寧有既哉

倫以訓父母

勅曰士蓄德挾材弗獲盡試後必有賢子嗣興  
以食其報此天道也爾故右春坊右諭德兼  
翰林院侍講倫文叙乃翰林院脩撰以訓之  
父鍾靈南服揚休 先朝雖再魁多士序陟  
華階然盛年無祿弗究厥用厥所抱負培積  
施於其子象賢趾美若出一轍遠到未可量  
也爾奚憾焉茲因子奏績特贈爾爲奉直大  
夫於昭寵命用慰冥漠

勅曰朕惟子繇母賢母緣子貴人倫之善道國  
家之令典也爾封安人區氏乃翰林院脩撰  
倫以訓之母孝慈敬慎相夫罔終乃教成令  
子競爽中朝咸有令聞爾其賢哉從夫偕命  
被寵 先朝茲推子恩加封爾爲太宜人茂  
綏壽祉之成永示慈闈之範

翰林院編脩張袞

勅曰朕思起事功品量庶官稍從易置若疏通  
致遠之士亦惟所用之奚不可哉爾翰林院  
編脩張袞資性英敏學識宏通初簡譽髦卒



業詞林後登臺察督學畿甸復因輿論攸屬  
改授今官考其務學以成身秉憲以迪士迨  
今較書禁署供事講筵咸稱任使焉累績日  
惟懋哉是用進爾階儒林郎錫之勅命於乎  
翰林固以儲養台輔匪直競長文辭爾其景  
行先哲明體適用日思崇令德策華勛以副  
朕簡賢圖治之意欽哉

南京吏部驗封清吏司主事盛應陽

勅曰留都重地吏曹清階雖職務稍簡然非公  
明端潔之士弗輕畀焉爾具官某明經起家  
登名天府筮仕今官聞爾之先揚休醫垣事  
我列聖茂著勛華迨爾之世乃克競秀儒林  
躅芳仕版詎非仁澤之流行與爾今慎於脩  
職嘉績來聞惟予爾嘉特授爾承德郎錫之  
勅命昔人有言不爲良相卽爲良醫其道一  
也爾尚崇休德以需大用敷播仁澤康濟生  
民斯爾之後昆將益昌熾焉欽哉

中書舍人毛希原

勅曰國家稽古任子以酬功也維公卿胄子才  
斯興不才斯廢予奪彝典朕固敢私爾中書  
舍人毛希原乃故太子太保禮部尚書澄之  
子初朕入承大統澄有迎扈功乃惟典朕三  
禮寅清夙夜厥攸嘉尚庸特授其子官以示  
優異爾乃慎厥職弗墜賢聲茲有司以初績  
來上用進爾階徵仕郎錫之勅命於乎人臣  
之節維孝維忠爾尚益勉脩樹永光於前人  
欽哉

南京吏部驗封清吏司主事顧夢圭父母  
制曰蓋臣惟孝能子惟忠肆國家褒揚臣工必  
逮其親者所以勸忠教孝也南京吏部驗封  
清吏司主事顧夢圭之父四川馬湖府知府  
致仕潛南國譽髦翰林吉士旣擢臺察屢進  
讜言陳古道英聲雅望聞於先朝迨督學  
北畿造士之功久而彌著卒尼於羣姦弗究  
厥用輿論惜之茲有令子筮仕郎曹夙焯聲  
績天道之不僭良可徵已用推其恩封爾爲



原件短缺

P14

中憲大夫錫之誥命爾尚訓迪後進表儀鄉  
閭益邵厥德以介壽祉欽哉

制曰古稱教子者父抑誘掖以成之滋有賴於  
母焉顯揚之願寧有間乎爾封孺人龔氏乃  
南京吏部驗封清吏司主事顧夢圭之母毓  
秀名家作配良士聿脩婦道命服在躬子復  
嗣宦起績弗墜家聲母儀益可覩已用特加  
贈爾爲恭人明靈未遷服承新命

刑部山西清吏司員外郎張寰

寵褒之典奚恡茲特進爾階文林郎錫之勅  
命爾其績文稽古思無愧於三長礪行飭躬  
期咸事乎九德懋章永譽用遲申恩欽哉

監察御史吳淮

勅曰粉署秩清經國重地官之屬烏臺地峻立  
朝雄柱史之威若爲官擇人因能授任則出  
此入彼辭尊居卑所弗計焉具官某擢秀南  
畿穎脫多士之選沾恩北闕通籍省郎之曹  
頃因董正臣工釐革政務遂收輿論用改今

官然考課之績雖仍舊資而寵錫之恩宜從  
新命茲特進爾階文林郎於乎繩違糺慝讜  
論生風於皂囊指佞觸邪直節飛霜於白簡  
爾其勉脩憲職以稱朕簡賢圖治之意則豈  
惟公家之利爾亦永有耀哉

刑部主事魏應召

勅曰刑以弼教淫則厲民固民命之長短所關  
尤國脉之興衰攸繫是以叔季之世幽枉鬱  
積則災變荐臻刻楮之徒文致太深則嗣續

弗競歷考載籍往鑒甚明具官某業起一經  
遂登名於天府職參三典乃作屬於秋官慮  
要囚必得其情治官書不辭其勤是以宅心  
平易著於臺察之評治事周詳最於考功之  
課是用進爾階儒林郎錫之勅命於乎臯陶  
邁種德旣專美於虞書蘇公敬庶獄亦垂休  
於周誥爾其益脩乃德遠乃猷踵遺躅於古  
賢播仁風於僚案俾相率以善以稱朕恤刑  
緩死之意則懋官申命朕豈爾靳哉

魏應召父

勅曰父有遠猷則燕翼必成其子子能於宦則顯揚必及其親此人倫之良圖亦國家御臣之令典也爾魏志寧乃具官某之父儲材黌舍久困鵬圖卒業成均方驕驥足廉能佐郡操存無愧於官箴詳慎明刑平反每矜於法畧籍起諸司之譽遽罹二豎之殃祿未盈材志弗究用乃有亢宗之子爲予執憲之臣屬嘉績之旣書肆褒恩之宜逮茲特贈爾爲儒林郎於乎振振麟趾仁厚之澤顯衍於子孫湛湛露斯汪濊之恩下漉於泉壤爾靈未泯尚克欽承

治中張秉正

制曰州郡之職號稱親民苟非其人民受其殃矧京尹之佐其責尤重者乎具官某領薦鄉闈儲材太學旣而授州牧擢郡丞並有賢聲以遷今職古人所謂別駕治中方展其驥足者也茲復奏績宜加寵褒茲特進爾階奉政

大夫錫之誥命爾其益展材猷勉盡職守持  
初志以不怠則過都歷國而致千里豈可量  
哉爰服新恩以須後命

少師楊一清曾祖父母

制曰易言積善之家必有餘慶詩稱永言配命  
自求多福蓋脩諸人則得乎天開其先斯裕  
於後事難倖致理本自然爾具官楊情乃少  
師具官某之曾祖父畿甸遺逸鄉邦老成詒  
謀孔臧清白之風未泯流澤斯衍昌熾之福

益臻肆爾曾孫作朕元輔才兼文武每收安  
攘之功望重華夷永終弼亮之譽顧其載登  
台席益殫材猷裁成禮書懋彰勞勩旣申恩  
於褒錫宜推本所繇來茲特贈爾爲少師錫  
之誥命於乎勲階峻陟式炳耀於泉扃簡冊  
具存永垂休於石室

制曰論水木必推其本源語家世必稱其宗祖  
良以宜家保族非一人所獨成啟祚揚休必  
累世而後發也考今稽古豈不然歟爾一品

夫人某氏乃具官某之曾祖母含姿貞淑作  
配隱淪孝慈勤儉之風舊著於宗姻富貴福  
澤之流誕鍾於裔胄爾曾孫某位極丞疑  
義親肱股中外更踐久著勞效於

累朝齒德並尊益懋勛華於晚節茲以裁成  
大典特錫申恩仍贈爾爲一品夫人匪特舉  
昭代之殊章亦以慰慈孫之永慕寵數旣極  
幽靈是承

少保兼太子太傅吏部尚書兼翰林院學

### 士桂萼

制曰孤卿貳公弘化冢宰統百官學士論思代  
言任莫重焉兼舉而勝之非名德罔克爾具  
官桂某遵道秉德以匡乃辟率其天常旣迺  
明於五刑典朕三禮銓鑒羣材庶績其凝嘉  
猷入告民陰受敷施矧茲彌成訓典昭示無  
極亦惟爾勤用進爾階光祿大夫勲柱國錫  
之誥命於乎維宰衡尹太保爽顯於商周爾  
尚益懋乃德樹乃勛迪於前人以光本朝升



於大猷欽哉

詹事府詹事兼翰林院學士霍韜

制曰儲端翰學清華貴重以待異材固將宣皇猷正國本倚任厥維重哉爾其官霍韜天性高明問學彊詣造士春官褒然蜚耀乃若志存經國識優知務厥所論思期矯偏振弊登於大道矧茲協議明禮匡植彝教功尤偉焉用進爾階通議大夫錫之誥命於乎簡賢圖治寔資三代之英報主摠忠懋行一人之慶

爾其欽哉

制曰妻賢夫賢夫貴妻貴蓋道有相成古今則然爾某氏乃具官霍韜之妻結髮事夫未幾萎溘相賢罔終可念哉茲特贈爾爲恭人典章孔昭爾尚服諸幽

制曰禮有備官故大夫得再娶國家推恩亦必逮焉爾某氏乃具官某之繼室歸於顯賢非儀罔聞宜家可知用封爾爲恭人服茲褒章益脩婦道欽哉

吏部稽勲清吏司署員外郎事主事潘潢  
勅曰古者天官之屬六十今總於四曹職要務  
劇非端潔脩敏之士曷克副焉爾具官某秀  
鍾畿甸藝業夙成起家明經褒然舉首乃策  
名天府報政牧邑咸右髦俊迨其登中朝試  
郎署既歷銓司益颺嘉績得士類若此朕心  
以寧矣茲特進爾階承德郎錫之勅命於乎  
以人事君忠之節也以身取人智之符也爾  
其益公乃心炳乃鑒不怠匪懈之共以終思

皇之譽欽哉

南京刑部河南清吏司員外郎鄒武

制曰刑部之屬視諸曹得人惟艱民命攸繫故  
也匪公忠明恕之士弗稱焉爾南京刑部河  
南清吏司員外郎鄒武畿甸之英明經起家  
筮仕郡倅卓有聲績迨進今官益克勤事盡  
職惟予爾嘉茲特進爾階奉直大夫錫之誥  
命爾尚益勵素節殫厥心期迪於古人之明  
謨種德哉

應天府府丞柴竒

制曰自古職重京兆矧留都爲祖宗基本之地肆惟丞貳必慎簡弗輕畀焉爾應天府府丞柴竒明經修行策名天府旣乃歷諫垣贊戎務輸忠宣勞光懋名績投閒斯久輿論譁然迨進今官乃益葳厥事脩厥職朕甚嘉焉茲用郊恩特進爾階中憲大夫錫之誥命爾其殫慮畢力升於大猷國家勸忠之典具在顯擢申褒寧爾靳哉

南京吏部右侍郎張邦竒

制曰在昔良臣碩輔必歷試節乃見謏薄誇訥之士久鮮弗渝焉咨爾南京吏部右侍郎張某策名先朝儲材翰苑旣而進宮僚位成均迨擢今職德風彌洽名績日起自非貞志質行奚以臻此爰推郊恩特進爾階通議大夫錫之誥命於乎慎始非難令終之爲難爾其益堅晚節弘雅道庶永厥譽哉

四川道監察御史王繼禮

敕曰朕惟君子不器其使人則器之故為官擇人斯人能其官國家考課庶司凡有勞效必加褒錫勸賢也爾四川道監察御史王繼禮關右俊乂起家明經再尹輔邑進歷郎署所至脩職樹功協於輿論用是改今官乃克肅憲度持風裁歸然中臺之望茲累嘉績特授爾階文林郎錫之敕命於乎古稱當朝正色便殿繪像者皆垂光信史千古不磨爾尚益勵忠藎方駕昔賢不永終譽哉

大理寺署右寺副事右評事朱節

勅曰朕惟刑所以防民俾反於禮者也惟導而弗率乃棄而弗宥吏多徇人以撓法深文以崇已民何繇不寃大理寺屬分總刑書慮而可否焉稱斯任者厥惟艱哉爾大理右寺署右寺副事右評事朱節明經起家獻秀天府筮仕理官而詳慎明敏多所平反茲其初績來上朕甚爾嘉授爾階文林郎錫之勅命於乎刑官制生民之命而廷尉持天下之衡爾

其益勵乃心敬乃事勸率僚以副朕慎刑  
弼教之意欽哉

吏部右侍郎徐縉

制曰大臣之職義莫急於進賢儒者之榮道寔  
隆於稽古故簡茂才以司銓部示殊恩以右  
講臣古之制也咨爾吏部右侍郎徐縉南州  
俊髦詞垣吉士經筵史局維久著夫賢勞而  
翰學宮詹乃荐登於華貫迨貳秩宗進少宰  
既躬親政務猶日侍講讀而謀謨啟沃允矣

夙夜匪懈者也朕甚嘉焉茲不限常制特進  
爾階通議大夫於乎登明選公爲朕知人之  
哲經邦致主盡爾責難之恭共圖至理益迓  
申恩欽哉

廣西道監察御史施山

勅曰古稱御史之職在彰善癉惡激濁揚清非  
剛正不阿明達有識之士弗稱焉爾廣西道  
監察御史施山明經起家策名天府出宰壯  
縣馳賢能聲簡擢今官持風裁於中臺振紀

綱於外藩厥所建白舉刺維公維明聿脩厥職朕惟爾嘉茲特進爾階文林郎錫之勅命爾尚矢乃心飭乃行益勵冰蘖之操永終金玉之譽則將來福澤詎有涯哉

杭州府推官陳箎

勅曰古者政平訟理咸責之守我朝酌前代之制郡特設專官理刑獄重民命也稱斯任者可無褒錫以勸賢哉爾杭州府推官陳箎夙以詩禮裔胄翹英甲科初佐劇郡誅鋤姦兇反枉折疑吏民懾服兼理庶政罔不殫慮畢力爲公私無窮之利交薦明揚卓績來上朕心嘉悅茲特進爾階文林郎錫之勅命其益勵爾志操展爾抱負勉樹華烈用迓申恩欽哉

戶部廣西清吏司主事王松

勅曰戶部古地官掌邦之大計以經國用殖民生爲司屬者匪良士弗稱焉爾具官王松明經造士揚名甲科筮仕今官立節勤務釐革

履文身公集卷之五  
三十五  
弊蠹三載考績所司奏最有端嚴剛敏之稱  
朕甚嘉焉茲特進爾階承德郎錫之勅命其  
益勵乃志操務舉職守臻于盛烈則朝廷駢  
蕃之恩寧爾靳哉

翰林院編修金璐父母

勅曰詩稱麟趾必及公之子姓明仁道遠而其  
利博也君之使臣勸忠以孝恩逮所生亦自  
親親之仁推之爾金某乃翰林院編修金璐  
之父慈惠成性長厚自持用穀於爾躬稱右

於鄉評厥所培積發於賢子擢秀甲科揚休  
華階爾則弗待詎非命哉茲用禮典推恩特  
贈爾爲文林郎翰林院編修錫之勅命於乎  
裕後以累仁爲燕翼報親以褒善爲顯揚率  
皆人道所難爾靈有知尚服承寵光益延永  
休於世世

勅曰母賢子賢子貴母貴古今通道也肆渙號  
馳封以重人倫昭國典朕奚恡焉爾某氏乃  
翰林院編修金璐之母宜家相夫迪成令子

爲我儒臣礪行敷文光於詞垣繫爾之身上  
壽康寧祿養方隆天所佑也不謂賢哉既賢  
其賢亦貴其貴茲特封爾爲太安人益綏福  
履之成永示慈闈之範欽哉

禮部尚書兼文淵閣大學士翟鑾

制曰周雅贊文王以寧秦誓稱一人之慶蓋厥  
猶翼翼多士所以不顯其心休休大臣所以  
有利備斯道者厥維難哉爾禮部尚書兼文  
淵閣大學士翟鑾天挺異材生此王國溫文

清慎簡在朕心考其陪法從佐卿曹迨今叅  
預機務益廣思皇之譽不聞媚嫉之風庶幾  
所謂不顯而有利者歟粵維裁成禮典懋著  
徽猷可無加異以示優眷茲特進爾階資政  
大夫錫之誥命於乎貴重代言揆道酌於喉  
舌職隆贊化體義親於股肱率素履以不渝  
迓天休之滋至欽哉

制曰國家於卿大夫之伉儷寵貴褒贈罔間於  
存沒者重齊體之義焉爾禮部尚書兼文淵



閣大學士翟鑾妻贈孺人蔡氏夙秉令德獲配賢夫而弗與偕老蓋數之不齊焉於維先命寔稍慰幽爽矣夫旣登於大寮斯褒崇之典所宜並進茲特加贈爲夫人於乎翟冠峩寵思永結於閨房鸞誥回光恩重賁於泉壤爾識未泯尚欽承之

工部營繕所所丞張輔

勅曰國家於百爾臣工均有褒揚之典顧惟職業之脩而崇卑無間將廣恩以勸忠也爾工

部營繕所所丞張輔夙以材諳選授是官懋著勤能弗曠厥職往歲勅建敬一亭爾寔督率羣工多效勞勩予甚嘉焉茲三載考績用進爾階登仕郎以爲爾榮其慎服之益圖報稱

蘇州府崑山縣知縣王朝用

勅曰國家重守令以重民也令之賢否繫民之休戚匪得其人貽上之憂爾直隸蘇州府崑山縣知縣王朝用蔚以儒彥擢秀甲科俾出

宰鉅邑乃有豈弟之風卓異之政民寔賴之  
聲績既隆爰書上考茲特進爾階文林郎錫  
之勅命以示旌勸於乎古稱郎官應列宿若  
爾之賢夫豈忝哉其懋脩持以需簡擢

戶部浙江清吏司主事徐元祉

勅曰戶部掌天下錢穀出入之政令故置屬視  
諸部為詳非才優經國志勵奉公貞介不汗  
之士曷足以勝其任爾戶部浙江清吏司主  
事徐元祉明經起家策名天府既乃聿脩厥

職懋著賢聲茲有司以嘉績來上宜有褒嘉  
以示優異特授爾階承德郎錫之勅命尚益  
懋修以迓顯融

直隸永平府灤州知州張國維

制曰牧守之職所以宣德惠安民生匪得其人  
惟朕之恤爾直隸永平府灤州知州張國維  
科甲之英筮仕畿輔乃克鋤強植良興利除  
害直道必達折而弗回撫字久勞聲績懋著  
朕惟爾嘉是用進爾階奉直大夫錫之誥命

於乎古重守令寔念邦本爾其益修厥職以稱朕保民之意嗣有顯陟寧爾負焉欽哉

掌鴻臚寺事太常寺卿魏境

制曰國家稽古建官太常鴻臚典宗廟朝廷之禮儀和神人柔賓旅階華而任重匪寅清慎敏之士弗稱焉咨爾掌鴻臚寺事太常寺卿魏境京國譽髦善慶迺社甲科臺察夙挺英翹迨自簡擢序遷今官賢勞在公爲日久而績益起朕甚嘉焉茲特進爾階通議大夫

錫之誥命於乎爲臣難難於恪共爾其益懋忠勤共爾位茂迺顯休之命

直隸大名府東明縣知縣沈大楠

勅曰國家數勤詔令以戒宰牧重民命也厥克稱朕意旨篤民於生生者寔鮮焉爾直隸大名府東明縣知縣沈大楠甲科俊髦出宰畿邑豈弟之風廉潔之操民甚安焉安則生矣考課之績實然是宜進爾階文林郎錫之勅命以示褒異爾其益脩厥職追古循良吏與

匹休焉將寵祐之綏不但是已

南京都察院右都御史萬鏜

制曰總憲要職留都重地百度久隳匪得忠賢  
振飭之曷繇以貞哉咨爾南京都察院右都  
御史萬鏜夙登賢科筮仕郎署歷清卿理官  
京尹所在舉職務累資焯望迨擢今官益克  
勵志操持風紀留臺爲重朕甚嘉焉茲用  
郊恩特進階爾資政大夫錫之誥命爾尚一  
乃心立乃節勉策勛業申褒峻陟朝廷寧爾

勅哉

南京都察院右副都御史蔣瑤

制曰風紀之司所以振肅百僚匡弼庶政非剛  
介忠藎之臣弗克稱斯任也咨爾南京都察  
院右副都御史蔣瑤擢秀甲科蜚英臺察旣  
乃領專城歷方岳民有去思公無遺便逮陟  
總憲益起明績朕甚嘉焉用進爾階通議大  
夫錫之誥命於乎福祿是適服恩休於未艾  
夙夜匪懈垂永譽於無窮

制曰妻之道從一而終故國家推恩偕貴於存  
沒罔間焉禮也爾封孺人章氏乃南京都察  
院右副都御史蔣瑤之妻賢能相夫宜爾偕  
老服榮非久而命不淑茲夫階旣崇宜有申  
命以示優異用加贈爾爲淑人泉扃有知服  
承榮寵

蔣瑤祖父母

制曰古稱詒厥孫謀亦曰繩其祖武故孫貴而  
恩逮其祖古之制也爾蔣顯乃南京都察院

右副都御史瑤之祖父清脩高蹈持身睦族  
足爲鄉閭表則肆爲善之澤鍾於闈孫宦成  
名立深可嘉尚特茲贈爾通議大夫南京都  
察院右副都御史欽服寵榮益昌遙祚

制曰慶垂後裔匪繇於一人恩覃貴卿少及於  
再世古今彝典朕奚恡焉爾王氏乃南京都  
察院右副都御史蔣瑤之祖母作嬪於良士  
成彼素風相德之休施於孫子茲特贈爲淑  
人用彰厥善以爲世勸焉爾其承之

蔣瑤父母

制曰古稱愛子教以義方亦惟以身帥之故子之顯親顯其教也爾封文林郎廣東道監察御史蔣鑾乃南京都察院右副都御史瑤之父敦樸自好孚物行義常推所有以周人之急非以身教者歟善迪厥子為朕憲臣褒封之命既被於生前追卹之典宜申於沒後茲特贈爾為通議大夫南京都察院右副都御史於乎孝思之則既光被於家邗錫類之仁

宜廣覃於卿士寵光維赫爾其承之

制曰母賢子賢子貴母貴人倫之善道國家之令典也爾南京都察院右副都御史蔣瑤之母贈孺人姚氏貞靜之德儉勤之風式隆闡範矣乃若相夫訓子立身成宦剔歷中外懋著賢聲予惟爾嘉茲特加贈爾為淑人匪直彰夫母道亦以慰夫子情

文康府君文章跋

前錄

贈文林府君詩一首

先集未入梓驚逾五十秋非如貯金壁三傳  
束高樓吁嗟後死者無一事遠遊爲請原疏  
稿閒中且較讐叔兒有雅志昨又入東州行  
時前致辭毋更置悠悠先美久不揚足爲後  
人羞雨霽暑未甚嗚此聞鄴侯

於乎右手澤一紙儼然如新先君子闡揚之  
志與不肖孫欸欸之微誠具見於斯矣久屬  
兒咸正請於吾仲兄敬爲纂定而不肖以五

斗薄遊有年未克卒業茲不肖病甚旦夕念  
此事恐遂爲幽冥中大憾初夏上澣力疾點  
簡大較幸不謬亟命棗梨行之兩世積悃籍  
手敬酬竊以私慰其諸掛漏之莫償裒益之  
未核不肖罪不敢辭是役也兒咸正頗効微  
力而醵金佐梓者宗族俱有助焉

庚午四月初九日不肖孫男謙服力疾百拜  
謹跋

文康府君文草跋

右我 曾祖考文康府君文草十卷蓋吾

祖考贈文林府君屬吾 考馬湖府君哀刻

將竣以貽吾伯兄咸正而不肖咸建偕弟咸  
受咸融共襄成事者也嗟乎昔韓忠獻王以  
先世鼓城蠡吾諸遺墨零落苦心訪求皇皇  
如恐弗獲而文中子纂叙銅川家世終以獲  
睹成訓自慶惟吾 文康府君功在國史德  
著人心而立言盛事久虛成編蓋以盡瘁在



位編帙多軼有所襲藏又以吾 伯祖考繼  
坳再軼閱若干年吾 祖考倡謀蒐梓又若  
千年吾 考始克成先志逮病革猶手較手  
跋可痛也咸建敬從伯兄咸正之後續蒐什  
三彙集計距吾 考背棄又十年焉嗟乎遲  
重至此勤閱可知吾 祖 禰兩世精誠遠  
埒魏國而子姓樂觀成訓竊比龍門矣敬條  
次如左

卷首帙爲代言先是吾 考纂刻 府君疏

草編卷一二擬續刻文草卽累屬於後矣戊  
寅秋不肖咸建求 府君軼稿於太宗六世  
天冢孫升霄所霄從故楮中簡得文目一冊及  
手澤數紙賚示則 命世

詔稿二  
制諭稿一

御表稿一也不肖咸建驚躍拜受跽讀

王言崇重加以尊

祖徽號冊

天隆稱球刀圖訓未足等珍敬梓卷首用式昭  
王回而詞頭褒封以類次焉竊伏惟念

肅皇帝制禮作樂追隆大典夔絕千古 府君

日侍

講幄於諸大議槩未敢倡和茲所撰述蓋大禮  
告成之後奉揚休命煌煌乎對

天

祖而震華夷矣至於翰苑制詞簡嚴敦重尤足  
式靡所可惋者諸大制作多佚不傳若太社

太稷時禘祈穀諸樂章奉安

九廟諸樂歌當與安世練時竝傳今古而惜乎  
僅存其目也異日者謁之太常而知爲嘉靖

時館閣所撰則猶 府君德音乎刻卷首帙

卷第一第二爲疏稿嗚呼此皆吾 考蒐纂

壽梓者也按升霄所藏文目多散軼獨疏草  
較原目無失更有從他本蒐輯者吾 考精

勤苦心具見焉蓋 府君志略稍表見一時  
而揆席未專且久弗克大展方侍從時以經

術啓沃

聖心於是詔天下學較有敬一亭之建而曾氏子孫列四氏世五經博士二千餘年廢典自府君疏得請也其于脩復西北水利經理諸鎮及松藩河套修理鹽法種種諸大務擘畫有素而龍蛇遽變諄諄見諸遺訓後之子孫能勿追企至吳中田賦利弊補牘者三卒與中丞石崗歐公刺史肅菴王公往復訂定條鞭均役請

可允行詳 國朝經濟錄茲疏草及書牘所載可覆觀矣卷帙次第不敢更吾 考排纂之舊刻卷第一第二

卷第三爲表先是吾 考刻疏草擬兼刻表蓋以篇帙未備也茲不肖咸建從升霄索得表稿若干首敬哀成帙莊誦數過一時遭逢明盛不啻矢音遂歌而讜直之氣忠愛之旨一篇三致意焉論者以爲敬輿風度矣進講洪範及四書諸解爲

世廟傾注多不傳止存一帙未敢漫入刻卷第

三

卷第四爲試錄蓋崇禎丙子歲伯兄咸正求得正德丙子順天試錄嘉靖戊戌會試二帙鄉錄 府君副之會錄 府君主之者也咸建以塲屋成例臆其半爲 府君手筆而反覆莊誦其議之弘正意之醇厚文之渾噩定其爲手筆無疑石經白鹿一表與 府君經術輔治若符節而發策見端言正心言庸禮

言性善言屯田水利蓋俱 府君生平學問之言至貽謀福善一問非 府君樹德積慶素志莫與及此咸建於從孫晉璠族譜之刻仰窺先旨俯勗後人絮絮道揚矣次表後而先諸文者尊

制典也刻卷第四

卷第五爲序大抵多酬酢之文竊以較今酬酢者異矣與立朝者言則輕榮祿獎恬讓其詞淳以遠與宰牧者言則厯撫綏戒貪暴其

詞莊以危而稱觥介壽之詞往往祖仁義敦  
孝弟足爲子孫傳法吾 考哀刻殆徧矣而  
送張德宏宰錢塘序見

皇明文範韻要序見坊本呂氏族譜得之吾姑  
之子呂兩若氏元音又復訪求一二稿因續  
成焉刻卷第五

卷第六第七爲墓表墓誌銘按墓表原目九  
首茲蒐刻八首而互有同異其原目所載懋  
齋陳公復齋王先生黃岡令陳公三表惜不

可得見也誌銘原目念四首茲數得半而其  
同者止敬齋先生盛汝成在竹梁先生質菴  
王公四表是二十首不可得見也行狀數首  
則俱軼無存矣先墨零落猶存什一倍宜珍  
襲焉刻卷第六第七

卷第八記傳賦各如干首向傳刻止遊馬鞍  
山記一篇已得特檜樓記爲 府君寄意之  
作昭德祠及兩廡記足徵文獻亟續梓之攷  
原目其記堂室者爲安定先生墓屋爲正氣

爲燕翼爲南山爲正齋爲高玄家慶而記題  
名則刑部太常俱具又有創建平順縣記又  
如脩復水利濬復吳淞二碑及他碑種種惜  
俱不獲見也傳止張思南一首考原目則止  
慈母傳一首其中秋月賦一首得之友人王  
平仲氏憂危慷慨見于和平浩瀚爲府君筆  
無疑而原目不載所載

七陵謁祀一章恭和

御製二章七夕靈鵲梧山翟母四章又俱渺然

遂使春容大篇等于煙雲散滅能勿三歎刻  
卷第八

卷第九爲雜著凡宗法諸論及祭法立後法  
足以明古禮翼國制子孫世守將於是在  
尚有冠婚祭祀諸儀式及衣裳制度則以屬  
之從孫晉璠入梓家乘中焉祈壽一疏或徵  
神怪茲錄其故實而多少箴學吃虧及諸雜  
說寓意則持身處世之道具是吾考哀刻  
蓋以訓後也攷原目有贊九則說三則題跋

五則俱宜入雜著類而今不可見矣刻卷第九

卷第十爲書牘而家書附焉嗚呼 府君所與諸當事劄皆軍 國大計畫然金石無一語及私也若家報所誠訓曰以讀書修行爲首務以治家防患爲要機曰讀書以體認道理變化氣質爲本脩身須先謹心術存方便曰省事節用爲治家之要清心寡慾讀書修行爲立身之本曰

大明律上不許爲者決不可爲曰損人利己之事決不可爲而束約僮僕嚴辭痛戒如恐弗及溫公康節諸訓弗啻焉不第瑣瑣如顏氏訓矣於戲詎非後世子孫永守勿替以承先而裕後者哉至于

寵眷優渥不存溫飽而積米利濟諄復再告府君仁澤所貽倍蓰篳金繼繼繩繩忍勿務滋蓋吾 考居恒提命一以 祖 禰之心爲心茲家報累累蓋丁丑歲伯兄咸正得之

長房從侄震寅所痛乎吾 考之未見全帙  
矣刻卷第十

於戲訪求惟艱劖劖不易凡我後昆尚其珍  
襲以垂不朽吾外舅 張異度先生刻越溪  
世集而授記曰苟諉蟲魚之蠹簡異蠅蚋之  
噪膚危乎其詞願以相誠矣

崇禎己卯天中節不肖曾孫咸建百拜謹跋  
于家園僂室

顧文康公文草目錄卷之三  
表

賀白鵲表

嘉靖十年

幸學克分奠官謝

賜新鈔羊酒表

嘉靖十一年

冊封祭告克捧

主官謝

賜祭品表

嘉靖十五年

十五年

謝 賜 內殿脯醢酒果表

嘉靖十五年

又謝 賜 內殿脯醢酒果表

嘉靖十五年

謝 賜 麒麟服鸞帶繡袋銀瓢等物表

嘉靖十五年



十五年

謝 賜飛魚表裏及銀瓢表 嘉靖十二年

謝 賜天神地祇壇祭品表 嘉靖十五年

重書 寶訓實錄 賜宴及 賜白金衣

馬 手勅加官謝表 嘉靖十五年

謝 賜松竹梅方袋表 嘉靖十六年

恭擬 元子撾過字義八十一目 進表

嘉靖十六年

謝 賜脯醢酒果及甘露表 嘉靖十七年

冊 天克使 手勅加少保等官謝表 嘉靖十七年

十七年

謝 賜川扇表 嘉靖十七年

謝 賜十二香薷煎表 嘉靖十七年

謝 賜貂鼠封領及金餅表 嘉靖十七年

謝 欽遣醫視疾及 賜猪羊酒米瓜茄

等物表 嘉靖十八年

奉安 陵碑賀表 嘉靖十八年

顧文康公文草卷之三

明光祿大夫柱國少保兼太子太傅禮部尚書武英殿大學士臣顧鼎著  
表

賀白鵲表

嘉靖十年  
同英國公張崙等上

嘉靖十年河南鄭王府獲白喜鵲一雙貢

至朔闕下八月二十九日該禮部奏進者

臣等誠懼誠忤稽首頓首上言伏以皇都

秋迥肇禋祀於西郊壽域天開現老人

於南極徵蓍收而薦祉感嵩嶽而效靈喜送

金門曾紀 先朝之瑞應輝交 玉陛再

觀 聖世之真符 朝野騰歡臣民胥慶茲

蓋伏遇

皇帝陛下 剛健為德 清明在躬動靜不違

乎

天鉅細必法乎

祖擴至仁而育物躋 聖敬以事 神親身務

乎耕桑化行率土精意孚於祈報福錫庶民

今則玉帛 四郊曠典歲周於二分二至衣

冠萬國歡聲雷動於三舞三呼適茲二鳥之

聿來誠是 三靈之叶贊翬翬乎瓊瑤作質

光儀孕玄圃之精皎皎乎霜雪為衣翔舞應

鈞天之節雌雄相應和鳴似唐殿之合歡飲

啄自如馴擾類夏庭之咸若睠惟純而不襍

潔而不污固繇於 聖心精一之感然而素

以為絢白以為賁寔兆夫天下文明之祥矧

靈瑞之來方岳所獻適當 夕月肇祀之際

誕聖屆節之先此誠 玄德感孚

皇天昭格用告太平 萬壽之符非偶然也  
陛下方且殷薦

九廟歸其功而不居宣示百官公其美而無外  
猗歟盛矣巍乎大哉臣等位忝元僚職分列  
署遭逢上瑞感激卑衷泰階聯鵠立之班晉  
接效鳳儀之舞伏願 中和建極 神化宜  
民日月運而四時行天地位而萬物育禮斯  
備樂斯和永作 百神之 主道彌高德彌  
厚允爲三極之尊 聖人多男早應華封之

祝 天子萬壽載徵江漢之詩臣等無任瞻  
天仰 聖歡忭感戴之至謹奉表 稱  
賀以 聞

幸學充分奠官謝 賜新鈔羊酒表

嘉靖十  
二年

嘉靖十二年三月十三日恭遇

皇上臨幸國學釋奠於 先師孔子 欽命臣  
充分奠官十六日伏蒙 宣賜臣新鈔三千  
貫羊一控酒十瓶者臣竊惟帝王之道非聖

文獻公文集卷之三  
三  
賢不能明聖賢之學非帝王不能行是以自  
古及今英君誼辟率皆崇儒重道稽古右文  
或脩禋祀於戎馬控僊之餘或崇儀章于邦  
國恬熙之日莫不昭光史冊澤被冠裳然而  
德業無聞事功不振誠未有 緝熙聖賢之  
心學 親紹帝王之道統如我

皇上之盛者也乃者 釐正典禮斷自 宸衷

臨幸辟雍重勤 聖駕奠獻祇行於釋菜

甄陶遂及於菁莪誠曠世之嘉猷非常之盛

節已臣叨厠章縫未聞俎豆星言夙駕仰肅  
穆之 周王裸將於京慚膚敏之殷士勤勞

莫效于奔走 寵貺乃及于賤微秩秩上尊

恩寔同於一卣煌煌寶鑑 錫何止於百

朋茁壯走大官之羊光榮逾康侯之馬臣敢

不祇承 休德益勵孤忠憂道不憂貧衰委

得謀于肉食有財斯有用沉寘彌謹于德將

爲人合歡豈患瓶壘之罄 賜牲必畜式勤

芻牧之求伏願 君治之 師教之永作斯

文之 主節以禮和以樂聿追隆古之風臣  
無任欣躍感戴願望之至爲此謹具本親賚  
奏 謝以 聞

冊封祭告克捧 主官謝 賜祭品表

嘉靖十  
五年

嘉靖十五年正月十五日恭遇

皇上舉行 冊封大典前期一日 遣宮祭告

太廟

世廟伏蒙 欽遣臣克捧 主官是日 賜臣

祭品者臣頓首稽首上言竊惟禮重備官固  
以奉 神靈之統祀嚴 清廟寔繇肇 家  
國之祥杓建甫 王春之泰來簋享當卿月  
之幾望 陟降在上洋洋乎瞻

祖考之格歆夙夜惟寅秩秩乎肅臣工之對越  
顧臣草茅賤儒章縫末品乃亦荷 絲綸之  
薦寵霑俎豆之餘芬殷士于京祀事式成  
乎奔駿 文母治內風化允洽乎關雎伏願  
于以采蘋于以采蘋奉 烝嘗於千祀載寢

之牀載弄之璋協徵兆於百男臣無任感  
激慶忭之至為此謹具本親賚奏謝以聞

謝賜內殿脯醢酒果表

嘉靖十五年

嘉靖十五年二月二十六日伏蒙頒賜

內殿收回脯醢酒果臣謹叩首拜受者臣竊以

謀詒燕翼頌文王之有聲慶集螽斯表

后妃之逮下協吉蠲於春月舉嘉禮于法宮

愚臣寔有以仰見

皇上聖不虛生而動可為法者也矧茲三星在

戶四陽決藩凝

天命當降鳥之祥承

帝恩順貫魚之序脩謁

內殿仰

祖考之同歡錫福寰區占本支之百世臣謬

內膺寵眷叨附元僚駿奔無事於裸將雀躍

聖有榮于俎豆攸介攸祉載歌生民之章

多壽多男式效封人之祝臣無任欣蹈感戴

之至為此謹具本親賚奏謝以聞

又謝賜內殿脯醢酒果表 嘉靖十五年

嘉靖十五年三月初九日伏蒙

聖恩以干祭告

內殿脯醢酒果賜臣謹叩首拜受者竊惟

上天之生育雖無意於栽培而

明主之勸賞乃有愛於嘖咲蓋不如是不足以

帝示好惡明予奪而爲厲世磨鈍之良規也仰

天惟

皇上四法天行道脩身正家茲者追念 嬪

御之平生爰舉 褒封于旣歿凡儀文之隆

殺悉斷自 宸衷而 典制之曰革咸垂夫

聖訓乃於是日 躬享 內殿夙臨 外

朝遣禮使以周旋加 賢妃之名號詎非所

以播 風化于遐邇而覃 恩澤于幽明者

乎臣莫效微勞叨蒙寵錫仰 絲綸之游逮

慙俎豆之嘗聞 臣 無任感戴欣躍之至爲此

謹具本親賚奏 謝以 聞

謝 賜麒麟服鸞帶繡袋銀瓢等物表



嘉靖十五年

嘉靖十五年三月十九日伏蒙 欽遣文書  
房官齎 賜臣大紅閃黃麒麟雲肩通袖膝  
襪羅衣一件紅裡絹一件青閃黃麒麟紵絲  
鸞帶一條鍍金壓口繡方袋一箇銀瓢一箇  
鍍金三事一副臣謹稽首頓首拜受者臣竊  
惟 文謨 武烈佑啓逮於無窮 寶曆鴻  
圖纘承歸於 有道既安內而攘外誠裕後  
以光 前政治聿新典章備舉仰惟

皇上 舜孝格天 堯仁覆物念

園陵

祖廟精神彼此相爲流通感春雨秋霜氣序寒  
暄速于代謝矧

八廟之建制已合烝嘗有期

七陵之思慕彌深松楸在望爰脩 展謁之禮  
庸攄休愴之懷是蓋

祖宗所嘗行而今古所僅見者也臣叨陪讜議  
幸際昌期愧燭火何補於 離明念珍品乃

蒙於晉錫麟袍稱體采章懸擬於上公鸞帶  
圍腰佩用雅宜於 扈從喧傳道路光被妻  
孥允為儒臣之至榮永作家傳之世寶臣無  
任鼓舞欣蹈感戴 大恩之至為此謹具本  
人親賚奏謝以 奏聞

謝 賜飛魚表裡及銀瓢表

嘉靖十五年

嘉靖十五年四月十八日伏蒙 欽遣文書  
官齎捧大紅織金單纏身膝襴飛魚紗一件  
翠藍雲裡紗一件銀瓢一箇 賜臣謹叩首

拜受者臣竊惟 神龍飛天易象 聖上嚮

明而開盛治巨魚縱壑史喻賢臣得意以匡

明時顧江海之微生挾杯孟之淺局敢言

成器幸遂攀 鱗恭惟

皇上 睿智聰明 剛健中正 仁覆無間曲

成不遺乃於章句之迂儒游遠駢蕃之殊寵

服以 命德愧片善之無聞 賞以酬功顧

微勞之罔効沾仙掌露華于一勺真同百丈

之恩波報天孫雲錦于七襄奚啻萬金之

重寶臣敢不鞠躬盡瘁思免袖手之訛因事  
納忠用殫沃心之義伏願五日皇極誕  
錫福於普天一索得男叶嘉祥于少海  
臣無任感戴天恩之至

皇上謝賜天神地祇壇祭品表  
嘉靖十五年

嘉靖十五年十月初九日欽蒙

聖恩以收田祭告天神壇祭品分賜遣祭官  
地祇壇祭品分賜捧王官各頒賜到臣  
謹叩首拜受者切惟萬邦寧謐感二氣以鍾

靈兆姓歡騰仰一人之有慶當百昌保合  
之令適

九廟告成之期篤聖嗣之挺生欽帝心之  
簡在宗祧永賴神人以和恭惟

皇上虞帝執中周皇建極理陰陽而贊  
化協上下以承休電繞璇樞聿煥前星  
之彩虹流華渚爰增少海之波胤祥甫  
屆於三辰昭告遂周乎羣祀暨孚假于

祖考咸顯相於武文穆穆威顏禮既成於對越

明明神惠寵再錫于臣工念臣叨陪鵠立之  
班每預駿奔之列榮寔兼於有事喜誠溢於  
無涯伏願 震一索而得男主器光承于七  
鬯嵩三呼而祝壽永年克比於岡陵 治功  
與 天地而同流 曆數衍本支于百世臣  
愚下情無任欣躍感戴之至

重書 寶訓寔錄 錫宴及 賜白金衣

馬

手勅加官謝表

嘉靖十五年

嘉靖十五年八月十九日該監錄官太師兼

太子太師武定侯郭勛總視經理官少保兼  
太子太傅吏部尚書武英殿大學士李時等  
恭進重書完

祖宗列聖 寶訓實錄臣謬以同經理官荷蒙  
聖眷與同郭勛等 賜宴于 謹身殿仍 賞

賜白金八十兩彩段四表裏羅衣一襲鞍馬  
一匹副 特降 手勅加臣太子太保餘官  
如故臣游荷 寵榮無任悚仄竊以 作君  
作師懋建 維皇之極 善繼善述聿隆達

履文身公文章入卷之三  
孝之稱惟 聖智獨邁於百王故 訓錄重  
光於

九帝煌煌乎縹帙琅函之什襲巍巍乎 金匱

石室之尊崇仰之彌高於斯爲盛恭惟

皇帝陛下 體道敬一 秉心塞淵 賤金玉

而善人興 垂衣裳而天下治謂

祖宗典則可以詒於子孫 聖神功化可以被

于來世是用重書 皇史藏之 寶歲遠恢

堯舜之勛華近昭文武之謨烈河圖大訓秘

璧府以垂光太乙鈎陳觀 薇垣而被寵鹿

鳴同於周燕馬錫擬於晉侯宮錦裁成義嚴

在笥雲章彩煥禮重承筐念臣竊祿詞林愧

論思之靡及備員史局顧經理之無能許身

愧比於南金空羣未超於北馬駑駘弱質論

功實恥據鞍組織賤工絜德何能補袞 以下  
稿佚

謝 賜松竹梅方袋表 嘉靖十  
六年

嘉靖十六年三月二十七日欽蒙 宣賜臣

大紅紵絲松竹梅方袋一箇臣謹稽首頓首

拜受隨卽佩帶 扈從者竊惟男子有事四方贈遺恒珍夫雜佩天孫織成五彩章華式耀夫行囊自慚下土之庸材累荷 上方之殊賜百朋踰分 恩隆 日講之臣三友同盟義重歲寒之物蓋松抱貞而閩世梅含馥以魁春菜竹曾比德之清蒼葺亦擬象于震是皆本於 淵衷之眷念而永爲奕葉之光榮者也念臣托孤根于士林擷羣芳于藝苑褻然舉首曾叨多士之先甚矣吾衰尚從大

夫之後棟梁效用掄材曷擬于徂徠律呂和聲鳴世豈侔于嶰谷味不調于衆人之口難濟和羹風有斐于君子之林徒希往哲幸際貞元之會叨塵 侍從之班凜冽冰霜飽歷嚴威於季歲汪洋雨露游蒙 惠澤於陽春臣敢不彌勵初心益堅晚節不忘抑戒願陳淇澳之詩屢拜 嘉祥載頌斯干之雅臣無任感 天荷 聖激切欣戴之至

恭擬 元子搢週字義八十一日 進表

嘉靖十六年

嘉靖十六年八月十五日該 內閣宣示

聖諭今日朕長女週歲如常儀過三物一珠石  
金鐲二珊瑚念珠三素金鐲此非男子朕將日  
月五星寶圭旗八件除之且日月五星諸玉亦  
未宜耳昨與卿等面議元子週周之物當有法  
象取則朕意作牌面刻以金書或一字或數字  
有關於君道以及玄妙之事共成牌八十一座  
各以金玉等類爲質卿等可擬其字義併示

鼎

臣

亦擬一副來欽此臣謹欽遵恭擬八十一日  
共一副謹用繕寫隨本 進呈 上塵具睿  
覽臣竊惟

天眷

皇明誕生 元子真重華而協

帝將繼體以承 軋雖克岐克疑占形容於胎  
教之後而良知良能當開導于蒙養之先茲  
天者大慶聿臻週歲之期世俗將羅百玩之  
具乃發 淵衷之獨智用爲 昭代之良規

思克享於天心須優盡夫君道法象取則開九九之數  
于無窮而垂範詒謀衍萬萬斯年於有永臣  
愚仰見大聖人之制作誠非尋常所能窺測者也但臣  
末學膚淺未能窵夫玄微極力揣摩終難稱  
夫詔旨然而區區犬馬之忠葵藿之誠則  
有在焉臣無任欣戴祝頌之至為此謹具本  
親資一奏聞

册 天充使 手勅加少保等官謝表

嘉靖十七年

嘉靖十七年十一月初一日恭遇

皇上祇薦

皇天册表臣愚謬膺寵使之命迺今年正月

二十七日仰荷 聖慈特降 手勅加臣少

保兼太子太傅武英殿大學士餘官如故臣

上疏懇乞辭免不蒙 俞允謹已稽首頓首

拜 命就列者竊惟台衡之任寔重於孤卿



鼎鼐之司尤隆于儲傳密勿寄詞垣之任  
清華崇秘殿之階此蓋儒臣之至榮誠非  
士所宜據也恭惟

皇上神凝萬化道貫三才  
允文允武極

彌綸天地之用建中建極操制作禮樂之

權道揆同先聖之荷孝德垂後王之範

淵衷獨斷薦皇號於圜丘大典祇

行揭表儀于宸極百神受職兆庶傾誠

念臣謬以菲才叨充命使接威顏而授

簡介膚士以裸將詎意尺寸之微勞過辱綵

綸之寵錫貳公弘化稽古訓於周官審道

示儲思嘉猷于漢志臣受恩之身雖老許

國之志彌堅敢不益勵忠貞期不隳于晚

節勉循德義務仰贊於重光臣無任感戴

天恩之至為此具本親賫奏謝以聞

謝賜脯醢酒果及甘露表  
嘉靖十七年

嘉靖十七年三月十二日恭遇

皇上以福建巡按官奏進甘露薦於

九廟祖考列聖伏蒙頒賜臣脯醢酒果十四日  
又荷 寵錫甘露分及日講諸臣謹已頓首  
稽首拜受者臣愚竊惟至德翔於六合則和  
氣孕軒轅之精鴻恩浹於萬靈則甘露依松  
栢以降載籍所紀振古如斯斷非偶然者也  
仰惟

皇上 文武聖神 仁孝誠敬 惠澤旁浹無  
遠而弗融馨香上聞無幽而弗屆是以 神  
祇格焉 宗廟享之而希有之祥諸福之物

紛至沓來非止一時一事而已也臣章句迂  
儒草茅賤士 講筵晉接久塵鵠立之班  
寵命渙頒每預駿奔之列迺勤 上方之珍  
品肆沾下土之微生膏馥逮于妻孥 榮光  
播于閭里醉以酒飽以德竊箕疇 玉食之  
聖餘芬凝如脂甘如飴陋漢殿金莖之仙液臣  
叨荷 寵眷欣愉鼓舞寔倍萬于恒情焉伏  
願海宴河清昭 太平于有象天長地久綿  
皇壽于無疆臣愚無任感戴激切之至為此謹

具本親賚 奏謝以聞

謝 賜川扇表

嘉靖十七年

嘉靖十七年四月初一日該內閣傳示伏蒙  
聖恩頒賜日講官四員川扇二十一柄人各五  
柄 特加賜臣一柄謹拜首稽首祇受訖臣  
愚竊惟先王之命有德固無靳于五服五章  
而明主之馭臣工乃或愛夫一嘔一笑其事  
則異其道則同顧維孤劣之踪叨塵 侍從  
之末曲成弗弃沒齒仰荷于 天恩 寵賜

皇游加秋毫知蒙夫 帝力矧茲 宗藩之珍

貢下逮 講幄之微 臣數邁等夷榮逾涯分

浪誇統素裁成寶月之團巧製溪藤染就紫  
雲之片施金貝以爲飾繪綵色以成文障炎  
旭而引涼颺舒卷咸資于日用出懷袖而藏  
篋筥用舍一順乎時宜臣敢不叩首拜嘉珍  
茲藏什襲誇示閭里俾咸被夫 皇風留詒子  
孫永傳之爲世寶臣無任感戴欣蹈之至

謝 賜十二香薷煎表

嘉靖十七年

嘉靖十七年六月十七日該 內閣宣示

聖諭日來暑伏交臨未免熱而心煩必須湯飲

茲與卿等各三鼎臣等各二以見朕意耳欽此

隨送到合欽賜藥一封內十二香薷煎二劑

謹稽首頓首拜受訖臣惟炎黃古聖討論每

切於鑿方民物羣生疾疢咸資於藥物故魯

論著無恒之戒周易示有喜之占是皆往哲

先賢假術以明道隨時以濟物者也恭惟

皇上心仁無不覆大聖無不知念茲暑伏之交

臨矧當雨澤之溼溽采葑采菲 洪恩特被

于五臣 如絲如綸 寵命已勤於三錫皇

皇雅道陋煎鬚和藥之匪情洋洋 聖謨含

苦口利病之深意臣恭已如法烹啜寧心適

調頓覺煩暍化為清涼衰殘轉為強健臣不

勝感戴欣蹈之至

謝 賜貂鼠封領及金餅表 嘉靖十七年

嘉靖十七年十二月十五日恭遇

聖駕發自天壽山於紅門外 賜貂鼠封領

一事又於清河 金殿中 賜金餅二枚臣  
謹頓首稽首拜受者竊惟 寵數關心秋毫  
知皆 帝力 恩庥被體春意覺自 天來  
珍品頒于 上方芳膏襲于下土衰殘是賴  
溫飽自將恭惟

皇上 聖智察微 至仁育物俯憐扈從特荷  
優崇真所謂解衣以衣推食以食者也臣  
忝廁簪紳粗知章句易稱鼯鼠戒竊位以示  
占詩著有皮鑿無儀而與剝 以下  
稿佚

謝合欽遣鑿視疾及賜猪羊酒米瓜茄等

夏物表 嘉靖十八年

嘉靖十八年六月十九日臣有疾具本乞

恩給假二十一日伏蒙 欽准二十五日蒙

遣通政林鳳御鑿宋漑就臣私家診視脉息

製藥調治二十八日又蒙 遣奉御馬仲良

齋送鮮猪一體鮮羊一控白米二石甜醬瓜

茄一罈粟酒十瓶頒賜愚臣謹望 闕頓首

稽首祇受訖至七月初一日臣疾稍可於

午門外行朝見禮部赴閣辦事當赴鴻臚寺報名初二日廷謝訖臣竊惟因材而篤天地所以生物惟疾之憂父母所以鞠子矧書稱玉食匹於威福易言大烹以養聖賢顧臣何人頻叨寵錫榮深愧集感極涕零恭惟

皇上仁體羣臣智周萬務惡旨酒同于

夏禹重民食邁于周王謂漢業之興本

于推食以食國士唐室之盛繇於和藥以賜

勲賢眷念恒切于近臣錫予每分于公餽

義隆問疾三折肱知爲良鑿禮重賜生一

投足載勤中使天厨玉碗粒食雲子之離離

僊掌金莖酒泛露斯之湛湛是生成之德

同于天地鞠育之恩過于父母者矣臣敢

不熟而薦之家廟割以分及妻孥念稼穡之

艱難莫效勤勞于四體食芻豢之肥腩粗悅

理義於一心歌既醉之太平祝豐年于大有

忍臭味之性以勵狗國之志資藥石之利

以扶報主之身臣無任感戴激切之至

聖奉安陵碑賀表 嘉靖十八年

嘉靖十八年九月二十九日恭侍

皇上於天壽山奉安

成祖陵碑禮成者臣等誠懼誠忭頓首稽首謹

言伏以聖人大孝通先繼述之稱王者

極功式重文章以顯肆我

有明之應圖受籙欽惟

太祖之闢地開天垂大業善守其成有公

文皇克為之後矧定鼎金臺據千古帝王之都

會而建陵天壽開萬世祚胤於靈長業有

加於前王文實煥乎當代功宜稱祖德豈

惟宗茲實恭遇

皇上聖德天成神謨日顯舉五帝三王之

盛治績

二祖

七宗之丕基制作並隆善美兼盡乃薦

尊稱于宗廟未更洪號于山陵顧穹碑樂

石鐫磨無改于舊文而丹質金書題制有崇  
於之聖制恭舉奉安之禮特勤告祀之行日  
麗 寶城拜明明之

成祖雲籠 玉殿瞻藹藹之

文陵篤生今日之

文孫克表當年之

聖子事如有待典實無前臣等扈從多榮贊襄  
何有預奔趨於俎豆光聳一時驂左右於  
乘輿 寵增百倍禮成 恩重既屢荷於

眷懷情至辭宣敢敬伸夫慶悃臣等無任瞻  
天感 聖欽仰歡忭之至謹具本稱 賀  
以 聞



顧文康公文草目錄卷之四

試錄

正德丙子順天程表

正德丙子順天程策第二問

正德丙子順天程策第四問

正德丙子順天鄉試錄後序

嘉靖戊戌會試錄前序

嘉靖戊戌會試程策第一問

嘉靖戊戌會試程策第三問

嘉靖戊戌會試程策第五問

顧文康公文草卷之四

東吳顧鼎臣九和著

試錄

正德丙子順天程表

擬宋以御書石經板九經并勅額賜白鹿洞

書院師生謝表

淳熙八年

某年月日南康軍宣到勅旨伏蒙頒賜經籍勅  
額臣等偕守臣奉迎安頓如法者謹誠歡誠忭  
頓首頓首上言伏以一德執中則天明而教立

重明麗正觀人文以化成綏猷允迪于先王造  
士不遺于僻壤甫及投戈之暇遂弘鼓篋之休  
士類傾心巖阿生色茲蓋伏遇○○○英毅  
性成聰明天啓大孝寔同乎虞帝丕烈克配於  
周王遠惟藝祖開基本於揖遜近體高宗垂統  
尤事表章家有塾黨有庠謂教典必端於蒙士  
興於詩立於禮庶德風肆被於成人顧慚講授  
之迂乃荷恩綸之寵竊惟白鹿洞書院者廢興  
凡幾文獻足徵在有唐初維李渤隱居迄五季

遂爲廬山國學入我昭代益闡儒風啓我前修  
每收治效偕嵩陽嶽麓睢陽三院並著聲稱歷  
太平興國咸平兩朝再蒙褒錫頃罹兵燹之禍  
鞠爲草莽之墟殘甃斷碑每興嗟於往迹齋居  
廩食已寢復於明時仰塵聖主之懷俯納儒臣  
之請謂有屋廬而無勅額詎爲經久之圖有生  
徒而無賜書未稱褒嘉之意一時載給衆美洊  
臻鈞鈐啓東壁之藏琬琰榻西雍之本琅函縹  
帙汗牛恩重於丘山奎翰宸章翥鳳光回於雲

漢榮並先朝之飛白制踰邃古之汗青天祿校  
讐輝分太乙藜火石渠臨決陋洗汲冢竹書炳  
炳乎龜書馬圖皇皇乎天經地緯山若增而高  
也寵冠門墻人爭覩為快焉喧傳衢道自茲煩  
鬼神而呵護可以免風雨之漂搖臣等忝竊師  
儒親沾教育敢不珍藏什襲瞻拜敬恭晝誦夜  
思竭仰鑽於聖學行義達道期黼黻於皇猷伏  
願作之君作之師敷皇極之言是彝是訓得其  
名得其壽顯嘉樂之德不愆不忘親承道統於  
百王永開太平於萬世臣等無任瞻天望聖激  
切欣戴之至謹奉表稱謝以聞

正德丙子順天程策第二問

問堯舜而下君德莫過於禹湯文武而後世  
言治者不越乎漢唐宋然考之經史所載  
不能無可疑者菲飲食矣何旨酒之飲必  
甘而後絕不殖貨利矣何苞苴之行必禱  
而後責烈假不瑕而獻女于受似非小心  
之翼世德作求而貢契于旅豈為細行之

矜數聖人者有大德致盛治而蹤迹之間  
猶可議者何哉乃若臨朝淵默尊嚴若神  
可謂有穆穆之容矣而漢業何以遂衰勵  
精政治幾致太平可謂有明明之聞矣而  
唐祚何以幾僨辟雍養老正坐自講非右  
文之主乎何信道不篤以詒中國之禍延  
英論政日旰忘倦非願治之君乎何晚節  
不終以生近習之變剛果聰明者若大有  
爲何以使民愁兵怨而激爲厲階機巧多  
技能者殆天縱之何以致天異人妖而終  
蹈夷禍之數君者皆挾異資纘成業而身  
名俱辱取譏于後世何哉我

太祖高皇帝

太宗文皇帝立極垂統道德功烈真足以超軼  
禹湯文武而並駕堯舜矣豈天質之美固  
出于尋常萬萬邪抑亦有修爲之方持守  
之要可以爲聖子神孫萬世法程而不可  
越者諸士子生長畿甸必嘗仰窺一二矣

其敬陳之將轉而聞之于上

人君欲治天下正其心而已矣欲正其心務于學而已矣夫君心天下之大本也天下之治忽係于心心之邪正本于學上古帝王暨我

祖宗心學淵微先後一揆是以天下善治而道德功烈垂休無窮漢唐宋諸君不知務學以正心是以事功卑污名譽不終而卒詒後世非笑於乎可不鑒哉請因執事之問而陳之自古及今聖治之善莫過于唐虞而君德之盛亦莫過

於堯舜禹湯文武善法堯舜者是故克勤于邦克儉于家禹豈酒于旨酒者乎防微杜漸曰爲後世慮宜爾也以義制事以禮制心湯豈黷於苞苴者乎省愆思咎曰遇災而懼宜爾也樂天知命不顯維德也獻女釋囚閔天之徒自獻耳文王何歉乎建極錫福無兢維烈也底貢厥獒西旅自貢耳武王奚累乎之數聖人者學已至矣而憂勤之念不息心已正矣而操存之功不忘觀其執厥中而敷文命也顧天命而修人

紀也危平易傾之道演于易也敬怠義欲之戒  
受于丹書也德業之盛與天無極有繇然哉漢  
唐宋諸君不知法堯舜者也是故成帝外雖尊  
嚴而內則湛于酒色陽阿禍水莫止披香博士  
之唾漢業之遂衰宜也玄宗初雖勵精而未幾  
溺于嬖幸華清麗質久垂柳城胡孽之涎唐祚  
之不移幸也明帝尊師重傅正坐自講似矣而  
迎佛書于天竺以汗中夏文明之統右文者固  
若是乎憲宗銳意勤政削平僭叛得矣而餌丹

藥于方士以速近習慘烈之變願治者固若是  
乎瓊林之財大盈之積如民之膏血何不免引  
虎糞而入室也德宗之聰明安在哉寶籙之侈  
靡艮嶽之竒麗如國之膏肓何矧復決藩籬以  
媚盜也徽宗之技能奚用哉之數君者氣質用  
事而不知所以務于學情欲爲主而不知所以  
正其心故倏而明倏而昏倏而彊倏而懦用君  
子則治任小人則亂崇正道則爲中國惑邪說  
則爲夷狄身名俱辱而詒笑後世無足怪矣洪

惟我

太祖高皇帝肇造區夏

太宗文皇帝輯寧邦家典則謀謨超乎禹文功  
烈聲華軼于湯武

列聖相承益隆繼紹真宇宙間貞元之一會也  
執事所謂修爲之方持守之要立極于前而垂  
統于後者亦豈外于務學以正其心哉愚嘗聞  
之

祖宗于聽政之暇輒御便殿召集儒臣講論經  
理切劘治道雖在深宮乃或乙夜猶考閱往籍  
研究聖賢之精微鑒觀前代之得失而于酒色  
燕遊佛老方術聚斂土木凡漢唐宋諸君所爲  
非惟不發之于事抑亦不萌之于心

太祖嘗曰人君一心治化之本存諸中者無堯  
舜之心欲施于政者有堯舜之治不可得也

太宗嘗曰人君誠不可有所好樂一有好樂泥  
而不反則慾必勝理若心能靜虛事來則應事  
去如明鏡止水自然純是天理朕每退朝未嘗



不思管束此心爲切要大哉王言乎是卽危微  
精一之旨而修己安百姓致中和位天地育萬  
物之道也非深體篤行實嘗用力于是其能言  
之親切如此乎心學淵源

父子授受是以道德功烈直追堯舜而並駕焉  
於乎休哉今

天子聖學緝熙正心圖治所以光前而啓後者  
無容喙矣愚則以爲欲法堯舜但法

祖宗不觀伊尹告太甲有曰欽厥止率乃祖攸

行臣敢誦此言以爲時敏日新之一助

正德丙子順天程策第四問

問詩曰貽厥孫謀以燕翼子又曰千祿百福  
子孫千億雖古聖賢莫不願望其子孫之  
蕃昌而凡頌禱乎人者亦必歸重于是蓋  
人情所同而天理之當然也但常人狃于  
一時利害乃或肆惡于身而不顧其子孫  
亦有不達損益之理不覽止足之分而營  
營于子孫富貴謀者皆惑也茲以古人之

言行可爲勸戒者相與評之身爲相國祿  
入厚矣而不爲子孫治垣屋位謝太傅賜  
予渥矣而不爲子孫益產業果何所見乎  
身親隴畝子孫將胼手胝足矣乃曰遺之  
以安性本公廉子孫常蔬食步行矣乃曰  
遺之以厚何以言之歟主母胡懼而遽有  
聞穆伯絕嗣之嘆絕嗣果足深懼邪內史胡  
知而遽有臧孫有後之稱有後果能前知  
邪衣食餘饒臣節可以盡瘁借曰不然能

忘爾私乎田宅便好帝德可謂念功借曰  
不然能保厥家乎治獄無冤而自知其後  
必興然則過于殘酷者信及于子孫否也  
將兵不妄殺而自知其後必昌然則肆于  
屠僇者信殃其子孫否也夫禍福之來以  
爲天道之必然而善惡之報時有不類以  
爲人事之適然而成敗之迹又似可徵亦  
有一定之說可恃之訓乎諸士子皆將事  
君臨民以右其族而世其家者其肆言之

以觀擇術之慎

君子爲善有心于徼福乎曰非也小人爲惡有心于蹈禍乎曰亦非也善者福之基也惡者禍之媒也善不與福期而福自集惡不與禍期而禍自至此理之必然也故君子非私其子孫而詒之以爲善之福小人亦非惡其子孫而中之以爲惡之禍蓋所趨殊途而所值異致自有莫之爲而爲者主張于其間耳是以古之哲人慎于擇術不徇夫目前而每慮夫身後不爲旦夕

之謀而爲子孫千百世計者誠有見乎此也執事發此策詢多士將因其言以察其心術之徵耳請試陳之子孫之于人大矣統緒基業吾受之于先祖者孰承而傳之邪曰子孫也是以古今聖愚孰有不念其子孫者哉但其爲謀則有不同耳蕭何致位相國不爲子孫治垣屋曰令後世賢師吾儉不賢母爲勢家所奪何果智邪則其言可以鑒矣疏廣懸車太傅不爲子孫益產業曰賢而多財則損其志愚而多財則益其

過廣果賢邪則其言可以省矣刺史問龐德公何以遺子孫曰人皆遺之以危吾獨遺之以安雖所遺不同未爲無所遺也夫以耕稼爲安則遺子孫以官祿者非危乎故人請楊伯起爲子孫開產業曰使後世稱爲清白吏子孫以此遺之不亦厚乎夫以清白爲厚則遺子孫以貨賄者非薄乎毋績而勸以自安公甫文伯之孝也奚至于絕嗣賢母之以身教其言固如此爾君違不忘諫之以德臧哀伯之忠也奚必于有後

賢臣之自天佑其理固如此爾王業偏安于鼎足是豈大丈夫之志哉其曰鞠躬盡瘁又奚暇私家衣食之謀卽此以觀管樂之比蓋自道焉爾兵權頓釋于杯酒夫亦保全功臣之道哉雖曰成功不居顧得世享田宅之利繇是以知韓彭之禍乃自取焉爾于公爲縣小吏治獄無冤而奕世貴顯殘民如周興來俊臣者寧免于赤族乎鄧禹身爲大將未嘗妄殺而闔門貴盛殺降如白起李廣者寧免于覆宗乎於乎天道神

靈日監在下惡盈好謙賞善罰惡毫髮不差但  
教子孫以忠孝勤儉毋導之以非道之爲寧令  
子孫清白久長毋累之以非義之得吾不計利  
鈍寧肯罔上以便其私圖吾不苟富貴寧忍殺  
人以爲已地功德及于民則世祿世官豈必危  
道名實加于上則爾昌爾熾決非空言勞以向  
義則耕可也績可也孰非裕後之謀仕苟爲道  
則兵可也刑可也孰非陰德之地阡陌甲第之  
廣誰無是心使割而未必能繼則垣屋何必多

治產業何必廣營筐篋衣食之豐誰無是心使  
積而未必能守則故人之饋胡不卻于暮夜聖  
主之惠胡不仁其宗族夫君子爲善亦性之而  
已小人雖愚獨無是心哉彼任情縱欲固以牽  
挽推拒于趨利避害之場不能自主矣又見夫  
爲善者偶得无妄之禍爲惡者或享非分之福  
則以天道寥遠未足憑據繇是作姦效尤肆無  
忌憚亾身喪家率繇于此善乎蘇軾之言曰盜  
跖之壽孔顏之厄此天之未定者也善惡之報

至于子孫而定也久矣胡寅亦曰人之爲善與惡天未必逐逐然而禍福之也理存感應如寒暑雨暘之消息自不可誣故人亦自修而已人能力于自修而天有不定者乎修之何如曰立德行義久操而不渝積功累仁世濟而無斁仰不愧于天俯不愧于吾心上不負君父下不負生民中亦不負其所學如此而其子孫不昌以永吾未之信也孔子曰積善之家必有余慶此又君子所恃以爲善而不移者愚也服膺斯訓久矣敢就正於有道執事其幸教之

正德丙子順天府鄉試錄後序

正德十一年秋八月

上命臣俊臣鼎臣主北畿試事事竣錄成鼎臣當序其後竊惟古者廸士材成而後進論材授官謹好尚明考課以先後之故士知自重而有立我國家學校之教科目之法最爲近古邇者士號明經習爲文發解無餘事朝取第暮篋書不復覽省者衆矣仕習于法理簿書不復知學

學矣而徒攻于詞章務枝葉失本根中無所主就世之趨而靡焉古之成材者固若是乎下此決禮義之閑困富貴之馳類則士途則科目志行則夫氓也是誠有負于經術廸士之初意矣夫六經皆聖賢經綸之迹其道極于天地通于神明學者誦其言而通其意已非常人况以是淑其身心蓄德侈業者哉嘗聞

先朝名臣往往朴茂堅持若無他技能而道德功業無愧于古其所成立偉然一代之望豈當時務實學尚質行所謂材成而後進者歟夫亦有以振厲作興之而不能自己也詩曰思皇多士生此王國今茲百年禮樂之餘畿甸俊造之選所謂其人夫豈少哉矧登名是錄者類能上下古今敷析理事醞齊以成文察人以言藹然鹿鳴之賓豈復有如前所云者哉必是之云者誠過計而厚望焉耳諸士子其仰思聖天子所以賓興我者之意不啻于吏治君子之用世不在于浮華益務績學砥行夷考老成

典刑湧而上之以求聖賢六經之道進將舉所  
實有諸已者措之以弼成采薇天保之治則主  
司之心始慰而諸士子所自立亦偉矣臣等祇  
奉明詔旣夙夜殫厥心力期以免不明之責因  
念夫南畿及諸省所薦士皆將登名天府後先  
效用而令甲科試朝覲之典相繼舉行是固人  
材進退之機而

祖宗作興振厲天下之微意也示好惡明賞罰  
公黜陟多士目擊于觀光之餘長善遏惡以成  
其材者亦將感且奮而不能已焉又何假于言  
哉是爲序

嘉靖戊戌會試錄前序

鄉舉士會試禮部入式始得預廷試第進士焉  
進士傳臚之日諸司展儀備物  
上御殿百官朝服拜稽稱賀辭曰天開文運賢  
俊登庸禮宜致賀國家之重進士如此自時厥  
後凡人生榮達可願之事踵至而他日樹勲業  
揚名譽享爵祿咸于是乎基之進士之果足重



如此然源其較藝于禮闈也會萃天下材雋而  
掄之以儒林之英裁之以侍從之大僚甄別陶  
汰率數十人而擢其一於乎難哉士不得預茲  
選者縱或抱負不羣未免淪于委瑣闈茸之中  
鮮克自振是會試寔進上階梯得失所關尤重  
矣嘉靖戊戌之春二月禮部尚書臣某舉舊典  
以考試官請

上命臣顧鼎臣臣張邦奇莅其事而同考則臣  
某某暨諸文武執事咸慎簡以克之陞辭入院  
之辰天宇宣朗風日晴暄大小臣工咸謂太平  
文明之象

聖天子孜孜求賢圖治淵衷默籲有以感召之  
迺罔不欣愉鼓舞思竭心力得真才以承休德  
圖報稱是歲天下新舊舉士入試者凡四千有  
奇鎖院三試之仰遵宸斷擢中式者三百二十  
人爰刻其名氏籍貫并文之雅醇者二十篇成  
錄以獻臣鼎臣謹序其首曰唐陽城有言學者  
所以學爲忠與孝也夫忠孝根于天性忠乃孝

移一道也諸士子幼學于家今日敷言于公寧  
外此哉言之非艱允蹈之為貴忠孝二者大節  
不隳則

皇天鑒佑永錫純嘏所謂榮達可願之事勲業  
名譽爵祿之大端咸優致之無難恭惟

聖天子道隆千古功光

列聖治化之隆誠匹休唐虞三代矣諸士子遭  
際盛時沐浴膏澤孰不共帝臣之願茲幸登名  
是錄不日將奉大對登甲科服官政光啓遠大

之圖其亦思夫明廷作養賓興我者之意何如  
而忍負之殫慮以出謀鞠躬以盡力作德以敷  
政至誠貫乎金石懿行通乎神明則身立道行  
勲業成名譽孚上足以報吾君下足以顯吾親  
出為忠臣入為孝子流芳史冊千萬載不磨矣  
諸士子他日所立卓卓如是寧不為科甲重乎  
寧不為主司榮乎若曰不服經訓不顧名義決  
藩維弛繩簡罔上殃民淫刑黷賄為庸眾人之  
所不為方且悻悻然負恃于心曰我進士也誰

若我何一旦奸神理觸憲典辱其身以及其親天下後世將指名氏而詬之曰此某科某人所取士也主司不明之責固難逭矣彼士也不有辜國家登庸之盛典也哉詩曰夙夜匪懈以事一人又曰夙興夜寐無忝爾所生忠孝之明訓也幸相與終身誦之

嘉靖戊戌會試程策第一問

問古先哲王庸禮以導民于善制刑以防民之姦二者交相爲用是以教化行而風俗

美久安長治歷世久遠咸必繇之洪惟我

太祖高皇帝平定天下作民君師爰命儒臣編

輯大明集禮刑官更定大明律兼總攷貫

斟酌損益以成一代不刊之典

聖子神孫恪遵成憲百六十餘年太平全盛前

代莫及於乎休哉大明律頒行已久集禮

一書我

皇上近因禮官之請特命有司刊布中外諸士

皇跡子俱得以仰窺因律賦益之

皇祖制作之盛矣其因革損益之槩可得聞歟  
皇土夫豐亨豫大之後未免法弊而政偏正德  
之季禮制不行刑罰不中綱紀幾于蕩然  
幸際

聖天子龍興更化善治躬行以勸率之加意以  
振勵之然教化猶未盡治風俗猶未盡同  
茲欲使普天率土向方承式以成於變時  
太  
雍之治何施而可諸士子行將登名仕版  
有安上馭下之責其肆陳之以觀用世之

學

對生民之情感物易動與之為善則善矣縱其  
為惡則惡矣是以古先哲王君臨億兆庸禮以  
導之于前制刑以防之于後凡使民去惡為善  
同歸于治而已禮以軌物刑以弼教二者交相  
為用而各得其理是以化行于上俗美于下而  
治功之成垂之久遠而無替也請因明問而陳  
之在昔元政不綱彝倫攸斁生民之亂極矣天  
眷我

太祖高皇帝大德受命起而驅除之汎掃汗習挽回華風念先王之禮所當修復也創造之初首徵耆儒編輯大明集禮肇自虞夏商周以迄于唐宋歷代所行儀文度數罔不畢載從而因革損益使近乎人情而合乎天理以成一代之大典凡吉禮之目十四嘉禮之目五賓禮之目二軍禮之目三凶禮之目二而復以冠服車輅儀仗鹵簿字學樂律諸目附之于後其道貫徹古今而經緯天地允爲萬世之法程於乎大哉

又以前代刑書未盡善也卽位未幾屢詔大臣更新律令至洪武六年特勅刑官詳定大明律上稽漢魏晉唐四家之書兼總條貫觀其會通從而因革損益皆折衷衆說而裁自聖心以定一代之法凡吏律之條三十三戶律之條九十五禮律之條一百七十一工律之條一十三而仍以名例律四十七條冠之于前其書統括事類而愜比情理永爲萬世之龜鑑於乎至哉聖子神孫恪守不忘致治之盛百六十餘年如一

日也迨正德之季權佞盈朝上無道揆而禮制不行下無法守而刑罰不中紀綱懈弛天下騷然幸際我朝四十有年之久而其書錄故事皇上誕膺寶曆起而作新之議禮明刑勵精圖治導率臣民皆本諸躬行漸以膏澤俟其自化豐功盛烈增光

祖宗矣而執事猶以爲教化未盡洽風俗未盡同者是豈上德之未敷下民之弗率哉特有司承宣者之不皆其人爾綜核考課之法轉移鼓舞之機是在聖君賢輔精神心術一運量之頃爾而普天率土有不向方承式者哉抑又有說焉易傳曰君子以辨上下定民志聖謨洋洋嘉言孔彰此庸禮制刑之先務萬世帝王所當屢省而力行之不可一日忘者謂宜特勅所司申明禮制嚴上下之分示好惡之端使公卿大夫各安其位農工商賈各守其業而無一人敢越厥志踰大閑者則君子克謹官箴而小人自不犯于有司矣唐虞於變時雍之治豈難致哉若

夫棄禮不講而專于嚴刑以求治不探其本不  
清其源徒末流之是務則非愚生之所知也謹

對其對農工商賈等事其業之入類

嘉靖戊戌會試程策第三問對公卿大夫

問性命之說精深而難知然切于吾身而爲

學問之源應用之本不可以不講也請試

言之孟子曰仁人心也程子謂心如穀種

仁則其生之性也邵子曰心者性之郭郭

張子曰合性與知覺有心之名其說同歟

否歟孟子性善之論與荀楊韓子諸說異

矣程子學孟子者也乃曰善固是性惡亦

不可不謂之性其說孰爲當歟灑掃應對

便是形而上理固無大小也或又謂神亦

形而下者何相違歟反求六經而后得之

學古乃有獲也或乃謂六經皆我註脚何

相遠歟知知天識彰識微知識何可無也

而詩稱不識不知思則得之弗慮胡獲思

慮在所先也而易言何思何慮豈造詣不

同而所見固異歟抑別有其道歟夫據聖  
可以折淆詳說將以反約斯固諸士子之  
能事也其詳著于篇

甚矣性命之理之難言也極深而不窮研幾而  
不眩致精而不雜通變而不礙神而明之而不  
遺夫然後宣而達之而不謬愚生何人也而執  
事以性命之說詢乎是殆使坎井之蛙而語東  
海之樂也邈乎遠矣雖然請試言之而執事擇  
焉蓋古之人未有以心性並言者大學言心不

言性中庸言性不言心本非二物故也孟子曰  
仁人心也蓋以性合心則性爲心之所以生之  
理而切于人也邵子曰心者性之郭郭也蓋以  
心對性則心爲形而下之器而具乎性也程子  
穀種之論取譬爲精其指仁爲生性固以知覺  
屬之性也而張子乃曰合性與知覺有心之名  
則目性爲塊然無知之物而不復知有天性本  
然之聰明蓋執器而昧夫道矣自今言之惻隱  
之心仁也非仁則心無惻隱矣是非之心智也



非智則心無是非矣是吾心神明之德孰非上天賦予之靈也而可謂人性之本無知也哉此張子強探力索語之未瑩而不能不啓夫後學之疑者也古之人未有以善惡言性者言善則已墮于氣言惡則實原于善本無不備故也湯誥曰若有恆性易傳曰繼善成性是主于善言而孟子傳之者也伊尹曰不義性成召誥曰節性其邁是就夫惡言而荀子執之者也發明性之源委程子爲備雖韓楊一隅之見亦未可盡

非也而孟子獨曰乃若其情則可以爲善則卽夫感物而動之欲而推見夫人生而靜之本然蓋汭流而得其源矣自今觀之爲惡至于寇盜極矣而或畏王烈之見知喪善至于效攘亂矣而猶服陳寔之雅量是至惡下愚之流且有秉彝好德之心也而可謂人性之本無善也哉此孟子灼見道體有功聖門而卓然特出于諸子之上者也程子謂灑掃應對是形而上理無往而不在也若以神爲形而下者則造化不測之

妙用反爲粗迹乎此必先儒未定之見或出于傳錄之誤也程子反求六經而後得之學古訓而有獲也若謂六經爲我註脚則好古敏求之大聖猶不足法乎此雖先輩矯俗之言終未免浮誇之過也知識進學之資而詩稱不識不知蓋言文王至誠不已如天之無心而默運耳思慮聖功之本而易言何思何慮蓋言天下屈信往來一出乎自然之感應耳學至于此則形而上者在我而有以全夫心性之本然可以語仁

可以語神矣若乃知識未至而妄意于不識不知思慮未審而遽語夫何思何慮則卒歸于荒唐而無據其爲學之害可勝道哉夫性與天道孔門弟子不得而聞焉未學勦說多見其不知量也雖然此非愚之言也孔子孟子程子之言也

嘉靖戊戌會試程策第五問

食木粟皆四

問積貯天下之大命軍國之重計也積貯之克繇于開闢田野田野之闢繇于興水利

除水害此古今天下之通道也姑自其切  
近者言之京師四方之極積貯尤不可闕  
焉者百官六軍羣工吏胥所食米粟皆仰  
給于漕運今沿邊諸鎮主客軍馬錢糧芻  
菽歲額時需之數咸取辦于太倉邇者災  
沴頻仍東南省府民力困竭是以綱運削  
弱供輸逋負京師之積不逮于前時况聞  
畿輔之地水患尤甚小民墊于危亡莫之  
省憂近地若此則遐陬僻壤不言可知已

夫四方民農困于凶歉雖饗殮藜藿朝不  
謀夕生命且不能保尚望其出賦稅以資  
公家之蓄積哉說者欲稽元學士虞集之  
議以開京東瀕海之田其施爲措置之詳  
可得聞歟集議初爲浮言所沮迨至正間  
海運不繼燕都乏食宰臣方議舉行其效  
僅足以紓一時之急而迄無關於成敗之  
數豈儒者之言果不足于用乎切惟河南  
山東陝西諸省俱有長川廣野可以開溝

洫畫經界成菑畬茲欲師前人之意推廣而行之可乎祛水害以拯民農興水利以闢田野樹穀粟以克蓄積此安內攘外致治保邦之良圖也諸士子究心于當世之務久矣其爲我言之將轉而聞于上

興事以濟世者固貴乎有天下之識又貴乎有天下之度而善用天下之才何謂識達于軍國之務察于利害之端是也何謂度寬洪足以受物朴毅足以任事是也二者備矣又能羅羣乂

集衆思量材而授任因能而課功何天下之事之不可濟哉執事策多士以時務而拳拳于京師積貯此大臣經邦之遠慮也一得之愚有所感發敢不直述以對鴻惟我

太祖高皇帝膺曆受圖誕開基于建業

太宗文皇帝順天撫運復定鼎于幽燕兩京並峙據天下之全勢握天下之要機內撫輿圖以君臨萬邦外扼關塞以控制夷狄此京師所以爲四方之極而聖子神孫萬世之業也夫兵馬

屯聚于西北財賦轉輸于東南經常之制不可  
易也然政之所適者時時之所趨者勢時有所  
不可而勢有所不能雖聖智莫之違况吾人乎  
是故善濟變者不膠于故常有權存焉姑以軍  
國之大務言之百官六軍吏胥工徒俸糧廩餼  
歲費不貲皆仰給于漕運邊鎮主客軍馬錢糧  
芻菽不時告急皆取辦于太倉此夫人所共知  
也但近年以來南畿淮揚蘇松諸郡災沴頻仍  
民農殄瘁催科之政日急撫字之勞罔聞北畿  
順天河間諸郡河流被壞霖潦成淵羣黎懷墊  
溺之憂官司無拯援之策此夫人所共覩也利  
民者微而害之者寢廣生財者寡而食之者彌  
衆則供輸安得不逋負運綱安得不削弱哉此  
京師積貯所當講也論天下事者每懷不可測  
之憂而深思不得已之計其于國家生民未必  
無小補也但恐俗儒以爲誕而庸人以爲狂莫  
之察焉元翰林直學士虞集建議于京東瀕海  
數千里萑葦之地築堤捍水募民墾田畫界分

畔立長率夫懸爵賞以勸其功持歲月以待其成然後相地高下漸徵租稅法未嘗不善也時人遂謂一有此制則執事者必以賄成而不可爲厥議遂寢後丞相脫脫因海運不繼燕都乏食乃倣集議而行之西自西山南至保定北抵檀順東至遷民鎮凡近水地土悉從司農立法召募佃種官給牛具農器稻種著有勞績者授官有差于是歲得粟數千萬石以助國用然惜乎良法美意不行于泰定閒暇之日而行于至

正危急之秋雖公儲蹙盈僅可紓枵腹待哺之急而國事旣去終難免折足覆餗之虞矣可勝慨哉夫集之議也非但可行于一隅而不可行于四方可行于昔而不可行于今也若山東河南陝西諸省及南北畿輔郡縣三代而下嘗行井田矣嘗開阡陌矣非無原野可以作田功川流可以興水利但惰農自安習以成俗而教民稼穡今無其人是以前有遺力地有遺利閭閻田野貧不聊生一有水旱凶災非淪爲魚鱉則

化爲豺狼矣安望其出賦稅以裨公家貯積之計哉萬一

聖天子超然遠覽委任忠賢倣古人溝洫陂塘之制稽元臣經界勸相之法旁咨博采務使合乎人情宜于土俗確然守之而斷然行之不惑于浮議不撓于邪謀數年之間不惟京師邊鎮蓄積盈溢公私有賴而諸省要衝皆將有倉廩之儲轉輸之備矣小可以爲凶年賑發之資大可以補宗藩常祿之乏地成賦壤旱潦有備而

無患民欣力本盜賊難騁而自消夫如是則皇威奮揚坐見士飽馬騰而西北之兵益振國計充足可以蠲逋損漕而東南之民暫蘇人心和天道順凶災滅熄吉祥萃止益綿宗社無疆之慶而永固山河不拔之基矣豈非宋臣蘇軾所謂萬世之計者哉雖然羣材備而成作室之功五味調而適和羹之用此大學論理財必歸重于用人也大臣忠于謀國卓識偉度固足以主持大猷矣而又握髮吐哺如周公好彥聖容有

技如秦誓而何患率作興事者之無其人哉安  
內攘外致治保邦之圖莫大于此倘執事與其  
進焉使得承臨軒之問尚當罄竭愚悃爲當宁  
陳之

顧文康公文草卷之四

終



